

**COLUMNNA**
**b. a. p.**

ERWIN ARDÜSER

Sco amatur da sport legel era cun interess ils rapports ed artitgels respectivs che vegnan publicgads en La Quotidiana. L'avust passà ha *Hans Huonder* rapportà da sias entschattas sco redactor da sport l'onn 1987. El ha raquintà dals derbis legendars tranter ils clubs da ballape da Trun e Danis-Tavanasa e da l'euforia dals fans che «mava amoc» sche l'arbitrer na tschivlava betg en favur da lur equipa. Quai eran anc temps!

Jau ma sun lura regurdà d'in artitgel legì en la Gasetta Romontscha da pia memoria. En quel aveva in correspondent (Corr.) explicitgà l'origin da quest sport cun reglas che valan sin l'entir mund. A savair vegnin nus era che gia ils vegls Chinois enconuschevan ina varianta dal giu, e ch'era a Firenze è quel documentà dapi il 14avel tschientaner. Per propi «inventà» il ballape sco nus enconuschain el oz, han la finala lura ils Englais.

Dal reminent: Anc oz vegn il «Calcio Storico» – ina maschaida da ballape, wrestling e rugby – pratigà a Firenze. Onn per onn s'inscuntran equipas dals differents quartiers da



la citad sin la Piazza Santa Croce. Il final dal turnier 2021 è stà ils 9 da settember. Per motivs da corona n'han aspectaturs betg pudì assister als gieus. Gudagnà han ils Blaus (Azzuri) da Santa Croce encunter ils Verds (Verdi) da San Giovanni, e quai cun 12:1.

Il Corr. cuntinuescha: «Igl ei buca de far curvien sch'era nos giuvens romontschs han tschaffen e simpatia per el. Nunditgond biars inimitgs, che sesprovan dil reminent de boicottar insumma tut svilup corporal de nossa giuventetgna, fa el onn per onn progress. Quasi mintga vischnaunca sursilvana, che ha la pussevltad de disponer d'ina plazza de giug, se presenta oz cun ina equipa.»

La tenuta quai che pertutga il «svilup corporal

de nossa giuventetgna» è sa midadà en il decurs dals onns – ed era la fevra dals fans è sa quietada. A quella conclusiun vegn era Hans Huonder sch'el scriva oz: «Il ballapei viva bein aunc, mo buca cun quell'intensitad ed emoziunalitad, cun quei fiug d'antruras.»

Eco tunava quai avant onns? «Ei capeta differents ga ch'il publicum lai curdar objecziuns ulti masivas encunter giugadurs... Il medem vala per las decisiuns dil derschader. Quellas ein, silmeins duront il giug definitivas. Pon ellas esser aunc aschi paradoxas, sche ha ei absolutamein negin senn de far opposiziun.»

La suandanta constataziun, formulada dal Corr. en la Gasetta Romontscha dals 26-10-1944, vala dentant anc oz: «Igl ei in punct cardinal, ch'in aspectatur sto posseder las enconuschientschas fundamentalas dil giug de b. a. p., sch'el vul persequitar cun interess e placher in «matsch». Aschia dat ei aunc oz biars ch'ei buca pertscharts ch'il giug de b. a. p. ei in giug d'equipa e buca ina revista de prestaziuns individualas.»

**Erwin Ardüser abitescha a Laax e lavura en l'administraziun da RTR.**